



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

1. Kalenderwoche – ab 4. Januar 2009

Gulduhrlandschafd

Nee, isch habb nischd geschn de Gulduhr! Soll doch hingehn, wer will! Annre duhn ehm ihr Geld zum Fußballbladz drachn, odor in de Gneibe, odor machn deure Reissn in alle Weld naus, odor zum Schiefahrn... ehm jedor wie ähr Lusd had! Wozu ha mm mir denne de Freiheit?!

Un jedor, dähr off was Lusd had, dähr muss daderfiehr bezahln. Das is iborall so! Bloß bei dor Gulduhr is das annersch. Also, bei dähr Sorde Gulduhr, die deur is - also, Obor, Dheador, Orschesdor un sowas. Ja, die Hochschdände in dor Gulduhrlandschafd missn immor dursch de Schdeuorn finanziert wern. Vom Schdaad odor von dor Gommuhne... - nee, wenn bloß die, die zur hochschdämmischn Gulduhr hingehn dun, bezahln dädn, da gäbs keene Obornheisor mähr. Un ooch keene Dheador. Es sinn ehm nisch sähr viel Leide, die Lusd off solsche Gulduhr hamm, wie se in de Obornheisor un in de Dheador schdaddfindn dud. Un es is ja ooch offd genuch nischd wie gegwirrde... - also, dor zwanzischde Offguß von irschendwas aus dor Glassig. Mid bißl Egdschn un Blut un Sauorei offgemozd... Nee, bloß daderdursch, dass sowas ginsdlisch am Lähm gehaldn wern dud, wird kee Schwanz zur Gulduhr geloggd!

So kleene Dheadors, die rischdisch vorsuchn dun, neue Sachn auszubrobieren, die sich rischdisch einmischn wolln in de Gesellschaft... ooch in de Bolledig... die rischdisch Gunds machn wolln... die duds kaum noch gähm. Die sinn ausgemärzd aus dor Gulduhrlandschafd. Irschendwie dud mir de Gulduhrlandschafd in Deutschland vorkomm, wie de Audobahn - scheen breid, scheen gladd, scheen deur!

Odor nemmor ma de Gneibnlandschafd. Wennsde eene Gneibe hasd un es dud keenor komm, mussde se endwedor zumachn odor du dusd eene neue Schbeisekarte machn. Ja, du mussd ehm dei

Angebohd off de Kundnwinsche ausrischdn. Das is ooch in einem Buff nisch annersch. Du kannsd nisch immor bloß langbeenische Blondienen anbietn, du mussd ooch e baar rundlische hamm, un kleene knuddlische. Un immor bloß so alde Fregaddn die Ferdi odor Budschieni noch bersehnlich gekannd hamm, das is nisch das Gelbe vons Ei.

Ooch wenn de eene Audofirma hamm dusd - wensde Audos baun dusd, die keenor koofd... un wenn se noch so glimafreindlich sinn... un noch so schbriddschbarend... - dann kannsd dischd machn! Da dun dann annre komm, mid annre Audos. Wo nähmlische Bedarf is, da findn sisch immor welsche, die dähn befriedischn dun. Un wenn ehm e Bedarf nach dor hochschdämmischn Gulduhr is, dann dädn sisch welsche findn, die das Bedürfnis befriedischn dädn. Ooch wenss keene Obornheisor gähm däde. Das is so bei Margdwerdschafd. Abor manschma gloob isch, dass alle die, die de Mardwerdschafd so hefdisch gewolld hamm, das Vordraun in de Mardwerdschafd vorlorn hamm. Moddo: Es lebe de Margdwerdschafd - fiehr die anndorn!

Eduard Sachsenmeyer